



De karnevalsgezèt  
van de KINDERSE  
RABBEDABBERS  
34 ste jaorgank

# DE RABBED

# ABBEBER

## *Mèt in dees editie:*

- Prins Jos III en prinses Heidi I
- Jeugdprins Lennert I en jeugdprinses Lisa I
- Bôm in KBC bliëktj ein promoesiejsjtuntj
- Hoofdpriës Tombola vanaaf volgend jaor zelf te keeze
- Kinderse dokters make wachttiëje aangenamer
- Websaait 'Kinderleaks' helptj uch oët de noöd
- Wistj gèe ...
- Revolutionaire ottogordel  
verhuëgtj veiligheid oppe baan
- TVL veur twië noew series in Kinder
- Coureurs oët Kinderse  
kèrmiskoers in opspraak!
- Vriëheidszonen investere  
in Vuvuzela's
- Mol in de raad?
- Môppe
- En nog veul miëj sjèele zeiver



Jeugdprins Lennert I en jeugdprinses Lisa I  
**Prins Jos III en prinses Heidi I**

# Proclamatie van Prins Jos III

Mèt de grasiej vanne Veurzitter en miène veurgaondje Prins, mèt de zèege vanne aoj-prinse verklaror ich hiejbiej vandaag mièn èllef punte .

## Ten iëste :

Ich, Jos Breukers, bèn vriëd content. Want ich maag uch vertèlle dèt ich dit jaor door het lèeve kan gaon es 34e groëwte prins vanne Rabbedabbers van Kinder es : Prins Jos den 3e !

## Ten twiëdje :

Ich gaon neet allein van dit prinsejaor geneete, ich bèn door het gek hèer det ich uch hiëjbiëj kan veurstèlle aan : Prinses Heidi de 1e!

## Ten dördje :

Nao dochter Cheyenne en zoon Jay-Dee, bèn ich noëw den dördje Prinselikke vanne familie op riëj, Dit môt de gezette gaon hole, dao blief ich biëj!

## Ten veerdje :

Mièn groëtste hobby is mich amezere mèt de pèerd. Get galopere in de natuur, zoë ein dinger zeen mich veul wèerd.

## Ten viëfdje :

Op vakantie gaon ich jaorliks nao de US of A. Het leefst mèt get kamereuj, en mèt miène gooie maot Dicky ter biëj.

## Ten zèsdje :

Ich beheers auch ein beetje de kunst van de gitaar,

mer ich gebruik ze neet miër veul Misschien det ich mich in mien prinsejaor nog ins bedink, en det ich toch nog ins speel!

## Ten zeevendje :

Höbtj gèe ein tattoo, of höbtj gèe diëj neet, Kinder Karnaval zal knalle, maaktj dèt gèe ter zeetj!

## Ten achtste :

Ein belofte gaon ich veur uch en de cafébase noëw al make Wee gaon ein van dees ein prachtige kroegtocht doen, om same ein fleske te krake.

## Ten neegendje :

Op zaoterdig 29 januariej is miëj prinsebal en op zôndig 6 miërt trèkke wèe door Kinder mèt de stoet. Ich hoop det eederein dao geit zeen, kôm ter diëj daag allemaol oët.

## Ten tiëndje :

Op eine zôndigmiddig dörf ich mich veur de F1 al ins in de divan te zette, Es ich zelf mèt de otto riëj is het minder snel, den is het van op te lètte.

## Ten ellefdje :

Ich bèn den iërste prins van Kinder met lang haor, dus houdj uch mer allemaol klaar. Ein gooi karnavalsplaat of keihèlle rock vinj ich allebei good. Es gèe gaotj fiëste inne zaal wiëj veurig jaor, hób ich zeker en vast gooije mood!




**Mièn leuze veur dit jaor zal dèn auch zeen :**

**Drink uch ein lekker pintje beer,  
mer vergèet veural neet het plezeer!**

Gedaon te Kinder inne sporthal oppe 34<sup>e</sup> prinsezitting van 8 januariej 2011 door de 34<sup>e</sup> groëwte prins van de Rabbedabbers van Kinder, Graaf vanne Simpelstraot, Hertog vanne Sjans, Baron van inktj tot naoldj, ugge euvergelökkige prins Jos de 3<sup>e</sup>

# Proclamatie Lennert I & Lisa I



## Ten iëste:

Ich bèn Lennert Jaroszewski, zoon van Danny Jaroszewski en Evelyne. En het breurke van Lotte. Mer dit jaor moogt gèe mich aansprèeke es jeugdprins Lennert den iëste!

## Ten Twiëdje:

Ich bèn Lisa Denier, dochter van Ronny Denier en Suzy Hillen. En de naam van miën zöster is Julie. Auch ich gaon het kômendj jaor eine fiëstelike tied tegemoot, es jeugdprinses Lisa den iëste!

## Ten Dördje:

In 2009 waas miëne pa de veurnaamste manskèerel in hoës, toen waas hèe Prins van Kinder. Mer noëw höb ich het ei jaor veur het zègge bjôs, want ich gaon veur niks miër en niks minder!

## Ten veerdje:

Ich woën oppe Kirkhofstraat, ein röstige buurt biëj het dörp. Ich gaon vraoge of de gemeindj veur get këntj zörge woë veul kinjer zich good biëj gaon veule. Van 1 juli tot 31 augustus ein hèk van veur en ein vanachter aan de wèeg, dèt wèe den hiële zomer boeëte kenne speule!

## Ten viëfdje:

Ich èet hiël gèer lasagna, het leefst de ganse wèek. Den iërste Kinderse kok dèe zich specialiseertj in de bèste lasagna van het landj, dao maak ich het miën prinserrestaurantj.

## Ten zèsdje:

Doot veur mich mer get èerpelpuree mèt ein stökske kip of haan. Stuit det op eine teijer veur mich? Den val ich aan!

## Ten zeevendje:

Ich bèn eine voetballer biëj KFC Kinder en doon ouch gèer aan carnaval. Op zòndig de 6de mieërt staon ich mèt miën prinses Lisa op de veurletste wage, mer det wist gèe al!

## Ten achtste:

Ich houj neet van ruzie, det wil ich aan eederein zègge. Is ter soms get vreijel met breurkes of zösterkes, den roop ich eederein op òm det zoë snel meugelik biëj te lègge!

## Ten neegendje:

Op de 29ste janewariej, mèt het bal vanne groeete Prins zeen wèe ouch weer vanne partiëj. Hopelik zeen wèe dao neet allein pa en ma bjuch, mer zeen auch òs lèeftiëds genoeëte terbiëj!

## Ten Tiëndje:

Of gèe mèt de stoet noëw op eine wage staojt of langs de baan, hiël Kinder môt mèt òs mèt veere, dao kumptj het op aan!

## Ten èlfdje:

Ôos leuze veur dit jaor zal zeen:

**Mèt Jeugdprins Lennert en jeugdprinses Lisa  
zal het dit jaor get gèeve!  
Wèe gaon same mèt uch allemaol  
eine prachtige carnaval belèeve!**

# Môppe

- ◆ De miniemen van de voetbal van Kinder haaje de wêeklike fair play wedstriëd gewônne van't Belang van Limburg en es priës moge ze mèt de ganse ploog nao ein training van Racing Gink goan kiëke. Op het inj vanne training moge ze zelfs penalties sjotte op Courtois, de kipper van Gink.

De miniemen sjeete zoë hël en zoë good es ze kinne en aaf en toe kint'r zelfs eine Courtois verslaon.

Op ei gegêeve moment is Bjorn, de zoon van Eddy en Miet Reeskens, es lèste aane beurt.

Trainer Vercauteren zeet: "Komaan hê jong, de lèste mot'r zeker in hê."

"Gein probleem," zeet Bjorn, "mèr wacht effe, ich bèn zoë trök."

Get later kumtj Bjorn trök mèt ein jônk ketje en eine ummer water.

Hêe dômpeltj dèt poeske inne ummer, lègtj de bal oppe stip, paktj eine aanloup en sjutj de bal zuuver inne winkelhaak.

Vercauteren: "Amai, gooje traptechniek, mèr veur waat hóbse diëj poës iêrst in dèe ummer water gedômpeldj?"

Bjorn: "Pa bjus zeet altiëd: Es de poes naat is, geit hêe ter vanzelf in."

- ◆ Pé Fiddelèers zaat mèt Pé Theijbers in Kinsport. Pé Fiddelèers waas get aan het klage tegen angere Pé. "Ich hób miër en miër probleme om hum recht te kriege." Pé Theijbers gaaf Pé Fiddelèers eine gooie raod. "Pé, wètse waat des dich môs doon? Dich môs speculaas ète. Dao geit ter dich van omhoëg. Det wilse neet weite!"

Den daag terop ging Pé Fiddelèers wiëj eine wildje nao bekkeriëj Martens om speculaas.

"Doot mich mèr 5 pek van dèe speculaas," zei Pé.

Het mèegtje achter het buffet antwoordje: "Zoudse waal zoëveul pakken, wat dèe weurdj dich echt keihèl hê."

"Det weit ich," zag Pé. "Doot mich anders mèr inins 10 pek!"

- ◆ Jacky en Thieu Nijs wore biëj Raf Nijs in 't hoës aan het wirk. Thieu waas mèt negelkes plenk aan het vast houwe. Om de paar negelkes goeidje hêe ter ein weg. Jacky bekeek het zich ins, sjödje mèt ziëne kop en geit nao Thieu toëw. "Jông," zag Jacky. "Veurwaat goëis dich zoëveul negelkes weg?"

Thieu lag het oët: "Kiëk Jacky, om de paar negelkes kôm ich ter altiëd eine tege mèt het sjerp van bove en het kôpke aan den ôngerkantj."

"Dich bès toch ein kuëke! Gebruuk diëj negelkes den strak veur de plafông!"

- ◆ 's Möriges kôme Wielke Fiddelèers en Tiny Cleeren mèt de camionette vanne gemeindj Natterveld ingereëje. Ze beginne ein sleuf te grave langs de wèg. Naoderhandj goeije ze diëj sleuf trök toe. Tom 'Jaak' Jacobs, dèe det allemaol get gevolgdj heet steltj zich vraoge en geit nao Wiel en Tiny toe. "Veurwaat graaftj gèe ein sleuf om ze naoderhandj gewuun trök toe te goëije? "Wèe zeen draodloos internet aan het lègge", zeet Wiel.

- ◆ Patrick Doumen waas in ein vergadering ferm aan't klage detter te weinig gerespecteerdj woor. De volgendje daag bracht hêe ei plakkaat mèt woë-op stuit: "Ich bèn de baas!". Hêe hing het op aan de deur van ziëne bureau. Nao de middig kwaam Patrick trök nao het èete en zaag detter eemes ei briefke ônger ziëj bôrdje haai geplektj. Op het plekkerke stông: "Lieve heet gebeldj. Ze wiltj heur plakkaat trök!"

- ◆ Marc Hendriks en Rudi Vanaken zitte in Café Sport. Rudi geit nao de wc. Efkes later kumtj hêe mèt ei bezörgdj gezicht trök. "Dju", zeet Rudi "Ich sjaam mich e bitje, mer dao löptj ein blauw streep euver miëne piemel."

"Oh", zeet Marc "Maak dich mer gein zörg. Ich haaj lèst allemaol roëj strepe op miëne piemel, en veur 25 euro heet dokter Bullen mich geholpe."

Geröstgestèldj geit Rudi sangerdaags nao Bullen. Hêe leutj ziëj probleem zeen, en dokter Bullen zeet: "Ich kan dich waal helpen, mer det geit dich 500 euro kosten."

"Waat?", zeet Rudi "De hōbs lèst Marc van ziën roëj strepe aaf geholpe veur mer 25 euro!"

"Jao", zeet Bullen. "Mer lippestift wegdoon is goojekouper es spatoojers."

- ◆ Marc Voortmans kumtj biëj Malpertuus en kiëktj hiël sip. "Waar mankeertj ter dich?", vreugtj Jos Vandewal.

"Och, Jos," zuchtj Marc. "Ich hób get tege Lutgard gezag en toen heet ze eine maondj neet miëj tege mich gekaldj."

"Waat vervèelendj," antwoordj Jos. "En wieniëj is det gebeurdj?"

Marc: "Get miër es eine maondj geleeje."

Jos: "Hoeveur kiekse den noëw nog zoë sip?"

Marc: "Ich kan mich neet miëj herinnere waat ich tege heur hób gezag..."

- ◆ Rikske van de Rappetappers tege Wendy, ziën vrouw: "Sjat, laote wèe ter ins ei prachtig weekend van make!" Wendy antwoordj: "Jao, det zeen ich waal zitte!" Rikske: "Good, dèn zeen ich dich maondj weer!"



# Bôm in KBC bliëktj ein promoesiejsjtuntj

Aafgeloupe zomer waas Kinder inins te klein. Het rëndj puntj aafgezat, ein politiemacht oppe bein gebracht en eine oët de kluute gewasse robot dèe mèt ein boterhammedoës euver de Breeërwèeg boldje. Dao waas volges auggetuuge eine euverval gedaon oppe bank. Zelfs de lokale radio Monza steurdje ziene bèste reporter DJ Bobo ter plaatse veur ein laaif sfeerverslaag.

Achteraaf bleek het allemaol ein groëtsjalige promoesiejactie vanne KBC te zeen. Mèt de crisis vanne aafgeloupe tiëd is het spaarbeukske lang neet miëj zoë in trèk biëj de luuj. Ômdet Marleen Peeters vanne topluuj van KBC de rente neet maag verhoëge, pake ze het anges aan. Eederein dèe ein noëw rëkening opentj, kriegtj gratis en veur niks ein ferm boterhammedoës oët de noëw collectie van Tupperware cadeau. Ôm dees actie good inne vërf te zëtte hëbbe ze eine euverval in scène gezat. Veur de gelegenheid heet Eric Peeters es zjèste veur ziej vrouwke zelf veur euvervaller gespeuldj. Het succes vanne actie waas groëter es gedacht, want de statistieke zëgge ôs det KBC het letste half jaor ei pak noew klantje heet moge ôntvange. De kans det ein en dezelfdje bank twiëë kiër weurdj euvervalle in korte tiëd is hiël klein. Het zitj hum dus ouch veur ein deil in het kôpke. Doordet de stunt zoë good aansloog, heet KBC ouch T-shirts laote drökke veur de geïnteresseerdje luuj. Dao is ein T-shirt mèt de opdrök: 'Ich waas terbiëj!' en ein anger mèt: 'Ich waas ter jaomer genog neet biëj!'.

De anger banke veule zich ôngertösse ei bitje gedupeerdj. Ziej wille ouch waal ins eine euverval zonger sjaai mètmake. Want de concurrentie is tegewoerdig bikkelhël.

# Hoofdpriës Tombola vanaaf volgend jaor zelf te keeze

Al jaore lank wintj eine gelëkkige dèe ein kaart veur de zitting heet gekocht ei vèt verke. Biëj het rëndjgaon mèt kaarte hëbbe ter zich dit jaor waal ein aantal piënlikke momentje aafgespeuld. De kins ummes geine reklame gaon make veur vëtte verkes biëj luuj die det hiëlemaol neet èete. Daomèt kan de winnaar vanaaf volgendj jaor zelf ein keus make. De hoofdpriës zal dèn zeen: ei vèt verke of ei familiepakket **HALAL** vleis.

## TOMBOLA MÈT ES HOOFDPRIËS




# Kinderse dokters make wachttiëje aangenamer



De Kinderse dokters höbbe eine noëwe service veur de patiënten. Ômdet de wachttiëje soms hiël lang koste trèkke heet dokter Bullen aafgeloupe jaor ein regeling getroffe desse op internèt of op ei bekske in ziëne gank ein afspraak kins make. Dao hingtj ouch eine camera veur ziën wachtkamer, zoëdesse op ziën websaait kins kiëke wiëjveul wuillesse ter al zitte aan te sjuuve inne wachtkamer. Veur de luuj diëj neet good mèt internet ôm kinne en diëj op good gelök aaf wille kôme heet hëe ein spellekeskast inne gank gezat woë gèe spellekes op kintj speule. Es het bekske veur afsprake te make neet bezat is, kinse ouch mèt de Nintendo Wii speule. Waat ein service!

Ouch dokter Hechtermans heet de wachtkamer get anges ingerichtj ôm het de wachkendje get aangenamer te make. Hëe heet ei paar more oëtgebroke ôm plaats te make veur get biljaars en snoekertaofels. Dao heet zich al ein club aangemeldj diëj van ziën infrastructuur gebruik wille make zônger det ze zeek zeen. De vrouwluuj vanne speulers van de "Kinderse B.C." kriëge heur mansluuj noë eindellik nao den dokter!



# Websaait 'Kinderleaks' helptj uch oët de noëd

Gèe höbtj er de aafgeloupe maondje zeker al van gehuurdj: dao is ein websaait diëj 'Wikileaks' hètj boë op eine houp vertrouwelijke informatie geleektj weurdj. Zoëwaal topgeheime oët Amerika en China, sjatkaarte vanne pirate, oplossing veur meujlike raodselkes es de codenummer vanne bankkaart van Pool vanne Heerlijckheid: alles weurdj geleektj op Wikileaks!

Ômdet wèe in Kinder leever neet leeke of mèt leeke zitte, höbbe ei paar Kinderse zelfstandige ouch ein websaait opgerichtj. Dees websaait zörgtj neet veur leeke, mer helptj uch diëj net op te losse. Via ei hiël gemèkkelik menuujke kriegt gèe ein oplossing veur al uch leekprobleme.

Höbtj gèe ein leek in het daak en règentj het binne? Den kintj gèe op ei knupke doëwe en den kumtj Bart Neel daakwirke det leek hiël snel make!

Höbtj gèe ein leek in ein raam of in ei daakvinstjer? Eine kiër klikke en dao kòme de mèn van Alracon uch al te hulp gesneldj.

Leektj ugge kraan of doesj, of luptj het water just neet miëj weg? Tony Vanwijck sneltj uch te hulp nao eine simplen drök op det knupke!

Leektj gèe zelf? Den is ter ein apaart keuzemenuujke! Aafhankelik van waat gèe dao in aanvinktj, kriegtj gèe ofwaal ei duëske Immodium van apetiëker Staeren, of ei pak pampers vanne Delhaize!

Gèe zeetj: de Kinderse zelfstandige gaon mèt hunne tiëd mèt! Veur diëjgene diëj nog gein internet aane koëi höbbe: zörgtj det gèe den trein neet mistj!



## Wistj gèe ...

... det ôzze **Prins Jos III** gebore is in 1967? En det det het jaor waas det ziëne pa Prins van Hunsel waas?

... det mèt **Jos** ter noëw 3 generaties Prinsen inne familie Breukers zitten, nao pa Breukers, Cheyenne en Jay-dee is noëw ouch Jos van adel!

... det ex-Prins Tony Vanwijck eine noëwe collega heet? **Eddy Coonen**, pa van ex-Jeugdprinses Rachel is al ettelikke maondje Tony ziene wirkmakker!

... det **Tony en Eddy** ter veur höbbe gekoze ôm biëj de Rabbedabbers te blieve. En det wèe dao vriëd content euver zeen!

... det **Sven Beelen en Raf Nijs** ôs twië noëw lede zeen!

... det wèe aafsjeid höbbe genome van **Jan Houben, Jos Moubax, Veus Peerlings, Ivo Theys, Bennie Verlaek, Roland 'Piël' Dirckx, Dirk Mooren en Tè Segers**. Wèe bedanken diëj minse van harte veur al diëj jaore en veur hunne inzet!

... det ôs zitting van volgendj jaor al in kanne en kruuke is, en det het opnoëw geit knalle inne sporthal!

... det dit jaor **Lei vanne Pepel** tot ridder inne Orde van de Rabbedabbers is verkoze. En det det euververdeentj is!

... det **Mark Hoedemakers en Tom Prenen** de medaalië van Kroëwnridder höbbe ôntvange.

... det 33 jaor geleeje **Piet Verstraeten** Prins van Kinder waas. En det det ôzze iërste groëwte Prins vanne Rabbedabbers waas!

... det 22 jaor geleeje diëj iër te beurt veel aan **Jean Knippenberg**. Toen waas **Jos Craeghs** ziëne Jeugdprins!

... det 11 jaor geleeje **Miel Vandewal en Yvette** ôs Prinsepaar waas. Det deeje ze toen same met het Jeugdprinsepaar **Sven Vossen en Sanne Heymans**.

... det de redakteur vanne Rabbedabber **Jo Kwaspén en Jaak Jacobs** wiltj bedanke veur de aanveur van môppe, en **Mark Meurs en Raf Nijs** veur de geweldige hulp mèt de foto's! Manne: bedanktj!


# Môppe

- ◆ Bram Terium heet oppe kienaovendj vanne basissjoëwl ein fles whisky gewonne. Hèe is es leefhòbber van eine gooje borrel nateurlik door het gek hèer mèt ziène pri-es. Hèe stoptj de fles in zièn binnemaal en geit heives. Oppe oprit struukeltj hèe euver eine stein en es hèe trök rechtstuit veultj er get naats langs zië bein loupe. Hèe jaomertj: "Och Hiër, leeven Hiër, laot het estebleef blood zeen..."
- ◆ Ed Smeets en ziëj vrouwke Linda ligge in bèd, es ter ins om veer oor 's nachts eemes ferm oppe deur bônktj en oppe bel duutj. Ed duit bove de raam ope en zuut ziène noëwe buurman Hendrik 'Veus' Neyens staon mèt ei stök in zièn veuj. "Ed, kôm mich effe doewe!", reuptj Hendrik. Ed zuut det neet zitte om veer oor 's nachts mèr Linda zeet: "Alé, Ed, maak dich oët dèe kôrf. Dich zouds ouch gèer hóbbe det ze dich helpe esse in panne stuis. Ed duit zich aan en sjraveltj den trap aaf nao ônger. Einmaol boëte is Hendrik neet miëj te bekinne. Ed reupt: "Hendrik, whoë zitse? Ich kôm dich effe doewe!" Hendrik antwoordj: "Ich zit al in diène hoof oppe sjômmel!"
- ◆ Ivo Theys en Patrick Ghijsels staon langs de wèeg te liften. Neet veul later stoptj Linda Eerdekenes mèt heure Mercedes. Ze wiltj waal mèr eine vanne twië mètpakke. Patrick geit mèt, en Ivo geit te voet wiejer. Nao ein half eurke stoptj dèezelfdje Mercedes biëj Ivo, mer deze kiër zitj Patrick achter het steur. Patje vertèltj ziëj verhaol: "Wèe wore aan het riëje toen Linda inins aan het Brook stopdje. Ze deej heur bloës oët en goeidje diëj oppe grôndj. Auch heure BH, heure rok en heur string ginge oët. Toen zag Linda tege mich det ich mocht pakke waat ich mer wou. Ich hób toen veur de Mercedes gekoze." "Det is good gekoze!" zag Ivo. "Waat houdse toch mèt diëj vrouwekleier kinne doon?"
- ◆ Lei vanne Limburger stuit op zièn parking mèt eine platte bandj. Hèe wètj neet good waat aanvange. Ruben Cleeren kumtj langs gewanjeldj mèt den hõnd en zeet tege Lei: "Mer Lei toch, blaos dèe door diène oëtlaot trök op!" Lei begintj oët alle macht te blaose in ziène knalpot. Efkes later passeertj Roel Bosmans, dèe zich biëj Segers eine lekkere frisco waas gaon hole. Roel zuut Lei ligge en zeet: "Waat is toch oët, Lei? Waat bèsse aan het doon?"

Lei antwoordj: "Alle locht is oët miène bandj en ich blaos hum trök op."

"Dèn zulse nog lang kinne blaose, want dièn vinster stuit ope!", lachtj Roel.


- ◆ Ruud Carpentier is zièn kernisse aant vèrve. Nao eeder vèeg mèt ziène beustel kumtj Ruud van zièn leijer aaf om dèe opnoëw inne vèrfpot te soppe, dèe ter oppe grôndj heet laote staon. Lange Né zuut Ruud bezig en vreugtj: "Bès dich noëw echt zoë lômp? Hang dèe pot toch bove aan diej leijer!" "Kins dich neet lèeze?" zeet Ruud. "Dao stuit toch duide-lik op dèe pot det het grôndjvèrf is!"
- ◆ Martine, de vrindin van Bart Peeters geit mèt de trein nao Brussel. Ze heet ei minirökske en ei sjoëwn topke aan en geit tegeneuver ein aod menneke zitte mèt ein hiël verrimpeldj gezicht. Martine kiëktj den ouwe mins aan en zuut inins al zièn rimpels wegtrèkke. "Waat is ter mèt uch aan de handj?", vreugtj Martine. "Tja," zeet dèe mins. "Ich hób miëj vel noë waal örges anders nuëdig!"
- ◆ Marc van Hoover tegen Steef Vanne Basdônk: "Zèg Steef, es ich mèt dièn vrouw slaop, zeen wèe dèn nog vrunj?" Steef: "Nèe." Marc: "Zeen wèe dèn nog kamereuj?" Steef: "Nèe." Marc: "Zeen wèe dèn vijande?" Steef: "Nèe." Marc: "Waat zeen wèe dèn?" Steef: "Effen!"







*Vrouwelikke veugelkes inne volli-  
èer van Guido Sniekers kriège ein  
klein bitje de meneere van Magda.*



## Revolutionaire ottogordel verhuëgtj veiligheid oppe baan

De priës veur meist verdeenstelikke oëtvijning geit dit jaor nao Danny Jaroszewski. Danny is nao ziën daagtaak es ille-trikker ouch veul bezig mèt het oëtdoktere van dinger. Hèe veuldje zich de letste tiëd neet miëj veilig oppe baan door het ônophaojelijk gezèeg van zië vrouwke, Evelynne. “Nao links, nao rechts, pas op veur dèe fitser, veurzichtig, te hël,

riëj ins get hëller, kiëk oët, ...” Danny weurdj ter hiëlemaol gek van.

Hèe heet zich dèn mer ins trökgetrokke in ziën tuinhuës-ke ôm ein geweldige oëtvijning te doon. Eine ottogordel veur zèegendje vroluuj! Oppe foto kintj gèe zeen wieëdet het wirktj. De internationale ottowèereld kaltj al van de gro-ewtste doorbraak sinds de airbag!



# TVL veur twië noew series in Kinder

## Oh Oh Kinder

TV Limburg wiltj gèer get miëj kiëkers lokke nao hunne zender. Ze hōbbe twië noew populaire programma's gefilmdj in Kinder.

Het iërste program waat vanaaf dit veurjaor op TVL zal kōme is 'Oh oh, Kinder'. Driëj jōnge sjerpe rëekels oët Kinder bringe heur vakantie door mèt driëj appetiëtelikke vrolluuj in ein tent van Jan Arie biëj Frans Heymans achter inne wei. Het geit òm:

Tom 'Sneke' van Lee  
Brecht 'Basdōnk' Vanhoef  
Jeroen 'Kuup' Kuypers  
Holly Hendrix  
Dorien van Mathijs 'taam' Maes  
Joke Hoeken van Jo Vaneygen

Auch Jos Houben en Wendy haaie goesting in ein paar wëeke verlot oppe boreboëte. Veur hun waas ter ouch ei plèetske veurzeen inne tent.

In aaflevering ein gaon de veer mèn fritte hole biëj Gi-Gi. Ze gerake echter neet miëj op tiëd trōk òmdèt ze bliëve plekke biëj 't Rondpunt. Weinig actie dus in aaflevering ein boëte get gespiëj en gesjavel. De vrolluuj hōbbe van ellende mer gewuën get druëg sneje broëd gèete, terwiël de manne glaze boterhēmkes hōbbe binne gesjōdj.

In aaflevering twië laote veural de vrolluuj zich van hunne bèste kantj zeen. Dao waas get vreijel òngerein. Joke en Holly haaie blijkbaar hetzèlfde bloeske aan. Det waas al neet erg bevorderlik veur de sfeer, en toen Dorien ouch nog ins opmerkdje det ze het ein liëlik bloeske vōnj, barsdje de bōm. De manskèerels koste het neet aanhooëre, en ginge mer nao Malpertuus. Weer ein aaflevering nao de haaie...

In aaflevering driëj bereike wèe het absolute deeptjepuntj. Dao gebeurdj werkelijk niks, òmdet de kèerels eine kater hōbbe en de vrolluuj krōm zin hōbbe. Eederein ligjt in de zōn te kuume of te grōmmele aan de Goërt op ziëne handdook. Op het lèst van de aaflevering weurdj Kuup waal nog nao de spoed in Mezeik gebracht. Door det zwumme in de Goërt haaj hèe get bloodzuigers op ziën batse gekrege. Piënlikke mōmentje veur òzze Jeroen...

Hoë zeen Jos Houben en Wendy gebleve, vraogt gèe uch vast en zeker aaf. Waal, al nao de iërste nacht haaie Wendy en Jos al zoë eine last van hunne rōk van op diëj veldbèdjes te slaope, det ze mèt de staart tōsse de bein trōk heives zeen gegaon. Zwumbōks en bikini trōk ingepaktj en richting het dōrp.

Veurdet aaflevering veer gefilmdj zou wèere, heet TVL de stekker oët de serie getrokke. Dao waas al genōg geldj verkwanseldj, vōnj de directeur van TVL. Oh Oh Kinder is de kortste serie oëts gemaaktj in de Belzje televisie-industriëj. Det dèn weer waal!



10  
Cholerisch

## Kindertestjerôm

Het volgendje format waat ze oëtgewirkj hëbbe is ein eige versie van Tomtesterom. Op TVL weurdj det Kinder-testjerôm. Het geit terôm det ein aantal Kinrooienaren opdrachten tot ein good injj bringe. De ein opdracht is al meujliker es de anger. In aaflevering ein môtte Jo Knabben en Christel Bakkers ein hardrockleedje make en dèn ein optreeje gèeve op Graasj Rock in Biësel. Det zal vônke gèeve tösse al diëj këttingbèere!

In aaflevering twië môt Dominiek vanne bôndj te voot ein tocht door het Brook make, op ziën bloëte veuj! Wèe hëbbe hum naoderhandj kinne fotografere wiëjdet hèe met ingewinjeldje veuj de piën aan't verbiëte is.

Auch burgemeister Brouns duit mèt. In aaflevering driëj is het aan hum ôm op ein wèek tiëd de splitsing van Brussel-Halle-Vilvoorde rôndj te kriëge.



## Môppe

◆ Jos Moubax is op 10 november saoves op het Sint Martinusveur vanne Brookhook. Hèe stuit aan ein taofel te vertèlle euver 11 november en wiej ter de karnaval geit inzètte op het dôrp. Dao stuit auch eine Duitser biëj hum aane taofel. Dèe mins zeet tege Jos: “Höbt gèe dèn mörge allemaol eine verloffdaag?” “Jao”, zeet Jos, “Wèe hëbbe in Belsj eine fiëstdaag op den 11dje.” “Oh”, zeet den Duitser, “Wèe môtte gewuën gaon wirke.” Jos antjwoord: “Jao, mer gèe woordj auch mer twiëdje.”

◆ Waat zeen twië croque monsieurs opein? Eine croque Janet.

◆ Danny Kunnen heet zich good laote gaon in het Rôndj Puntj en taffeltj mèt ei stök in ziën veuj heives. Ôngerwèeg kumtj hèe langs ein wei mèt eine bök. Hèe sjörgtj euver de draod en puktj zich de bök mèt. Einmaol toës strômpeletj hèe mèt ziëne bök den trap op, nao de slaopkamer woë ziën vrouw al mèt eine kwaoje kop ligtj te wachten. Hèe duit de deur ope en zeet: “Kiëk, det is noëw diëj stôm geit!” Debke zeet tege Danny: “Zaate sjöp, dèt is eine bök!” Danny antwoordj: “Wèem zeet det ich het tege dich haaj!”

◆ “Dokter”, zeet Angèle van Veus tege dokter Hechtermans. “Maag miëne mins nog waal sex hëbbe nao ziën hartinfarct?” “Jao”, zeet dokter Hechtermans. “Mer waal allein mer mèt dich, want hèe maag zich absoluut neet miër opwinje.”

# Môppe

- ◆ Stefan Thaens kvaam gisteraovendj bjeur en woor ter van besjöldigdj gedrônke te höbbe.  
Hèe zag tege Martine, ziën vrouw: “Bewiës het dèn mer ins!”  
Martine: “Det hoeft neet.”  
“1: De höbs er het karakter veur. 2: De wèts den drank staon. 3: De höbs de kinnis òm ei fleske te opene. 4: En de haajs ter vandaag den tiëd veur!”
- ◆ Just veur het sloope gaon vreugtj ôzze noëwe Prins Jos den 3de aan zien Prinseske Heidi:  
“Sjat, höbse veur mich nog anger minnaars gehadj?”  
Gein antwoordj... Ein lange, piënlikke stiltje volgtj...  
De Prins vreugtj efkes later stillekes: “Bèste al aant sloope, sjat?”  
Prinses Heidi: “Nèenèe, ich bèn nog aant tèlle.”
- ◆ Miranda Vitali, zelfstandig verpleegster, is bezig mèt ein oad vrouwmes van 90 jaor te wasse.  
“Zulle wèe de breevebös ouch mèr effe wasse, medam?”, vreugtj Miranda. “Laot mèr.”, antwoordj het vrouwke. “Ich höb al 40 jaor geine post miër gehad.”



# Coureurs oët Kinderse kèrmiskoers in opspraak!



Dao zaat ei viës löchtje aan twee Kinderse coureurs oppe Kèrmiskoers. Dirk Bullen en Raf Kiggen, diëj iërste en twiedje wore, zeen naoderhandj betraptj op valsspeule. Bullen zaat aan de blooddouping op het moment detter wôn. Hèe is ein wèek veur de koers getrappeerdj toen hèe aant traine waas oppe Basdônk. Hèe fitsdje veurbiëj en het waas duidelik te zeen detter eine gebruekdje tampon inne môndj haaj!

Auch Raf Kiggen is in opspraak gekômê. Dao löptj momenteel ein ôngerzeuk nao het gebruik van eine moteur in ziëne fits. Het fitse ging hum oppe Pinksterkoers ei bitje te gemakkelik aaf en oppen daag zelf ginge ter al roddels rôndj detter waal ins ei brômmerke in ziëne fitsekader zou kinne verstoptj hëbbe. Wèe vanne Rabbedabbers hëbbe Miel Vandewal al ins aan de tandj geveuldj euver ziën meugelikke betrokkenheid, mer moteurMiel weigtj alle commentaar. Det Maarten Christis gevallê is, dao weite wèe ôngertösse ouch het fiëne van. Hèe koersdje constant mèt de moël wiëd ope en kreeg zoë hiël get vleege binne. Det ging lank good, tot det hum ein vleege in de lochtpiëp sjoot. Versliktj, hooste wiëj eine këttingrauker en op ziën oëre! Het kan raar loupe sôms! Wèe gèeve Maarten de raod ôm volgendj jaor mèt ein môndjmaskeke oppe fits te kroëpe. Inne Legerstock kense diëj dinger goojekoup kriegel!



# Vriëjheidszonen investere in Vuvuzela's

Eedere voetballeefhübber kintj ze, diëj irritante trômpette diëj ônger het WK voetbal veur koppiën en sjeijinge van lang getrouwdje koppels heet gezörgdj. Veur de minse diëj dachte dèt de ellendje veurbiëj zou zeen: gèe kômjt bezeiktj oët. Fanfare De Vriëjheidszone heet namelijk ôm miëj jeugd aan te trèkke fors geïnvesteerdj in ei paar palëtte Vuvuzela's. De lede van het jeugdorkest hóbbe van Pierre Sniekers, de veurzitter vanne fanfaar, ei stökske môtte speule op het galaconcert in november.

Ômdet op zoë eine Vuvuzela gein knup staon, wore ter in het begin waal get probleme ôm liëge en hoeëge toëne te speule. Den dirigentj heet dèt euvelke echter opgelostj door ein paar klein aanpassingskes.

Op de foto is good te zeen det Roel Baens de baspartieje veur ziën rëkening puktj. Jordi Lemmens speultj de hoeëg noëte. Hèe heet ein hiël strang bökske aan môtte doen. Aojeme duit door det spannerke zoëveul piën det de locht diëj Jordi nog net oët ziën lônge kriëgtj gepeestj ein hiël hoeëg toën produceertj. Biëj de bastoëne van Roel spriktj de foto veur zich. De gala-aovendj is perfect verloupe. Allein Frederik Vandeweyer hóbbe ze nao de pauze mèt aojemholingsprobleme môtte aafveure. Det hèe achter Roel zaat biëj het optreje zal dao waal get mèt te make hóbbe!



# Môppe

♦ Raf 'Lavy' Smeets heet zich eine noëwe hândj gekocht. Hèe geit nao Bruckers veur eine control en ei spuitje tege de wörm. Bruckers begintj aan het ôngerzeuk en zeet: "De wèts toch det dèen hândj mer driëj puuj heet?"

"Waas mich nog neet opgevalle, ich hób det biëst zoë gekocht", antwoordj Raf.

"Hèe heet auch mer ein oug", vervolgtj Bruckers ziëne commentaar.

"Tja, ich hób hum zoë gekocht", zeet Raf opnoew. "Ich gaon toch ins eine scan make van diën hundjé", zeet Bruckers, "Want missjiën is ter inwendig auch het ein en anger mis."

En jao, effe later keek Bruckers oppe foto. Mer ein neer, mer ein lônge, ei gèetje in het hart, ...

"Ich gaon diën hundje hiëj môtte haoje ôm hum aaf te make", zeet de vitterenèer.

Neet echt aangedaon geit Raf heives.

Ein wèek later kumtj Bruckers saoves de wachtkamer binne en zuut hée Raf opnoew zitte. "Waat kums dich doon?", vreugt Bruckers verbaasdj. "Ich kôm ins zeen of desse miëne hândj al aaf hóbbs", zeet Raf.

♦ Tom Prenen weurdj ôm 1 oor 's nachts tege gehaoje door Bart Douma, de pelis van Kinder. Den agent vreugtj aan Prenen: "Whoë geis dich nog hèer op dit oor vanne nacht?". Prenen antwoordj: "Ich gaon nao ein lèezing euver alcoholmisbruuk en de effecten daovan op het minselik lichaam." "Echt waor?", vreugt Douma, "Wèem geit zoë ein lèezing nog gèeve ôm ein oor 's nachts?" "Evenlien, mien vrouw!", zuchtj Prenen

♦ Bart Pierson en Kurt, ziën broor, wore aan het wirk op eine boëwwerf. Ze zaate bove op het daak. Inins keek Bart nao ônger en reep hée keihèl: "Greun bove, greun bove!"

Zoë ging det ein paar kiër, tot dèt Kurt noësjierig woor. Kurt kroop tot biëj Bart en vroeg: Zèg Bart, veurwaat zits dich eigelik 'greun bove' te rope?"

Bart: "Jông kiëk, dao ônger is Tei Gitaar graasmatte aan het lègge!"

♦ Twië doppers oët Mezeik kôme zich tege oppe straat. "Is diën doggeldj auch gestege veurige maondj?", vreugt den eine aan den angere. "Jao", zeet de twiëdje. "Ze zulle dèn waal content zeen van ôs zeker?"



Ôngerzeuk van Bèr Smeets bringtj groëtste leuge oët de reklamewèrelldj aan het leecht! De kins duidelik zeen det Bart Janssen vanne Rap-petappers neet kumtj!

# Mol in de raod?

Den oplèttendje lèezer heet veurig jaor ôngewiëfeldj gemerkt det ter nogal get zake diëj wèe vanne Rabbedabbers in ôs gezèt aan het leecht brachte auch door anger gezètten zeen aangehooldj. Doordet wèe ein naas hōbbe veur heit noets hōbbe wèe in ôs gezèt nateurlik altiëd get primeurs, en veur angere noetskanale is het dèn mekkelik en goojekoup om dèt noëts auch te bringe. Veurig jaor waas het echter hiëjl opvallendj det ôs gewaardeerdje collega's van den Ertesjiëter krek hetzelfde noets brachte es det wèe al iëjder deejje. Dao woor nateurlik drek gedacht detter waal ins eine mol biëj ôs Rabbedabbers kos zitte. Aangezeen Jan Linssen veul contacte (zoëwaal legaal es louche) heet

in Kèsing weze de iëjste ôngerzeuke in ziën richting. Hèe is trouwes al ei paar kiër opgemerkdj inne buurt van het redactielokaal vanne Kèsinger Ertesjiëter mèt verdachte pekskes. Ômdet wèe neet veur 100% zeker zeen van whoë het lek zijt, zeen wèe mèt de redactie vanne Rabbedabber oetgeweke nao ein bèter beveiligdje plaats. Daag en nacht is ter bewaking mèt hunj, en dao moge auch ônger gein veurwaarde foto's getrokke wèere inne naober. Pool vanne Heerlijkheid zörgtj eedere daag veur lekker èete en veur ein fles sjampajn op ziëne tiëd, zoëdèt wèe aan ein stök door kinne wirke! Wèe hope det dit jaor de inhoud vanne Rabbedabber dèn auch geheim bliëftj tot dèt de gezèt biëj eederein inne bōs viltj.



*Koesjiëte KFC gemanipuleerdj!*

Dônderdig 3 miërt 2011  
**Dialectoëtzending  
radio Monza**

Van 13 tot 18 oor

Zôndig 6 miërt 2011

**35<sup>ste</sup> stoet**

Vanaaf 14 oor

Maondig 7 miërt 2011

**Verklèdj bal  
inne fanfarezaal**


Gratis inkom

Vanaaf 20 oor

*Wèe bedanke van har-  
te de hanjelèers van  
Kinder diej ôzze wim-  
pel gekocht hóbbe !*

*Het is dankzij uch det  
de karneval in Kinder  
kan bliëve bestaon !*

De ômluip van de stoet, mèt opstèlling inne Esserstraot enne Kirkhofstraot.  
Ôntbinjing en groëwte ambiance naoderhandj inne fanfarezaal.



Verantwoordelijke oëtgèver: vzw KVRK, 3640 Kinder. Redaksie Rabbedabber: Mark Hoedemakers  
Dit Rabbedaberke is gedrôkt biëj Drôkkeriej Hugo Symons in Bree. De leejour is gemaaktj door Ria Froidmont, dèt wirkij biëj drôkkeriej Symons.